

DJALUNA

Esnan proklamá pa Dios i Esnan ku ta proklamá nan mes

Kiko ta e karakteristikanan di un berdadero profeta?

“Kiko bo ta pensa di e muhé ku ta reklamá di ta un profeta, ku su mensahenan ta riba YouTube?” un ruman ansioso a bisa direpente, miéntras mi tabata saludando miembronan di iglesia despues di e servisio di adorashon un Sabat mainta.

“Pa ta honesto, nunca mi a tende di dje,” mi a kontestá. “Laga mi wak e vidionan promé, anto e ora ei lo mi por duna bo un kontesta mas dirigí.”

Despues di a wak i vidionan, mi a diserní ku aparentemente, e muhé no tabata un berdadero profeta. (YouTube a duna gran espasio i visibilidad na profetanan ku ta proklamá nan mes.) Kiko ta move un persona pa asumí ku nan a risibí mensahenan profétiko for di Dios? Mas importante ainda, kon iglesia por evaluá si un hende realmente a risibí mensahenan profétiko for di Dios? I si nan a risibí e mensahenan ei, e ta hasi nan profetanan inmediateamente?

Na un banda, nos mester tene den mente ku Dios ainda ke komuniká ku nos pa medio di profetanan. Apòstel Pablo ta rekomendá: “No paga e Spiritu. No despresiá profesia. Saminá tur kos; tene duru na loke ta bon” (1 Tes. 5:19-21). Nos ta kometé un eror serio si nos ignorá e mensahe profétiko berdadero, sea ta esun ku Dios a transmití na nos pa medio di e profetanan di antaño òf esun ku Dios ke komuniká na Su pueblo na fin di tempu.

Na otro banda, Kristu a spièrta tokante e lantamentu di profetanan falsu: “Tene kuidou ku profetanan falsu. Nan ta bin serka boso bistí manera karné, ma di paden nan ta lobonan feros” (Mat. 7:15). Tambe nan lo aspirá pa gaña asta e skohínan djis promé ku e Segundo Binida (Mat. 24:24). Ta p’esei e konseho di Juan ta masha kla: “Stimánan, no kere tur spiritu, ma pone e spiritunan na prueba pa mira si nan ta bin di Dios, pasobra hopi profeta falsu a sali bai den mundu” (1 Juan 4:1).

Pruebanan di e Profetanan

Kiko, anto, ta e karakteristikanan di un berdadero profeta di Dios? Beibel ta mustrar ku e fenómeno di ‘lantamentu di profetanan falsu’ no ta úniko na Kristianismo kontemporáneo. Ya el a manifestá su mes meimei di e pueblo di Israel den e dianan di Jeremias (Jer. 14:14). E kontemporáneonan di Jeremias a ser instruí pa uza e filter di profesianan kumplí komo un prueba pa un profeta genuino: “Ma e profeta ku ta profetisá pas lo ser rekonosé komo un ku berdaderamente a ser mandá pa Señor solamente si su predikshon bira realidat” (Jer. 28:9; lesa Deut. 18:21, 22).

Tene den mente ku e ministerio di un profeta ta enserá muchu mas ku pronostiká futuro, i ku e prinsipio di profesia kondishonal ta estable’sé ku un kambio den kondishonnan òf den relashonnan por impliká tambe un kambio den e futuro pronostiká (lesa Jer. 18:7-10), manera a sosodé ku e predikshon di Jonas tokante e destrukshon di Ninive.

Un otro elemento di prueba ta konserní e koherensia interno di e mensahe profétiko. Un Sistema di bèrdatanan revelá ta konsistí di un kadena di mensahenan relashoná ku otro. E mesun Spiritu a revelá tur e mensahenan profétiko den e kánon di Skritura (2 Tim. 3:16). Pa e motibu ei,

kada mensahe nobo mester ta den harmonia ku e bèrdatnan anteriormente revelá: “Bai na e lei i na e testimonio! Si nan no ta papia conforme e palabra aki, ta pasobra nan no tin lus den nan (Isa. 8:20). Kristu Mes a apelá na “tur e Skrituranan enkuanto di Su mes” (Lukas 24:27) di pasado pa mustrá ku Su mensahe komo un profeta i Su sakrifisio komo Mesias tabata berdadero i e profesianan a ser kumplí korektamente.

Seguramente, bèrdat ta progresivo (bèrdat nobo ta ser revelá despues di tempu), i mas despues profetanan ta añadí idea- i detayenan na e bèrdatnan ku ya a ser revelá dor di profetanan anterior, pero den ningun forma e mensahenan nobo por kontradesí e mensahenan duná den pasado.

Miéntras ta bèrdat ku loke ta konta ta e mensahe, no e mensahero, i e profetanan ta solamente sernan humano ku tur nan debilidat- i limitashonnan, Kristu ta yama nos pa mira e fruta den bida di un presunto profeta ora nos ta husga nan outentisidat: “Na nan fruta boso lo rekonosé nan. Hende sa kita wendrùif for di mata di sumpiña anto, òf figo for di bringamosa? Asina, tur bon palu ta duna bon fruta, ma e palu malu ta duna mal fruta. Un bon palu no por duna mal fruta, ni un palu malu no por duna bon fruta. . . . Asina anto, na nan fruta boso lo rekonosé nan” (Matt. 7:16-20).

Aunke tin biaha e ta tuma tempu, un lobo ku hamber trempan òf lat lo mustra su djentenan dor di su máskara di karné mansu.

Naturalmente, tur profeta mester ta Kristoséntriko, konfesá e naturalesa divino-humano di Kristu, i eksaltá Su sakrifisio pa humanidat: “Na esaki boso por rekonosé e Spiritu di Dios: tur spiritu ku ta konfesá ku Hesukristu a bin den karni ta bin di Dios, ma tur spiritu ku no ta konfesá Hesus no ta di Dios” (1 Juan 4:2, 3).

Otro señalnan di un berdadero profeta por inkluí e naturalesa puntual di nan mensahenan (2 Reinan 6:10-12); e naturalesa práktiko di nan mensahenan (kontrali na apstrakshon- i generalisashonnan); e fruta den bida di esnan ku ta sigui nan mensahenan; i risibí e revelashonnan a traves di soño- i vishonnan (Num. 12:6). Sinembargo, nos ta hasi bon di kòrda ku pasa e prueba árido den kualke òf algun di e señalnan akí no ta hasi un hende un berdadero profeta, meskos ku e vishon divino ku Rei Nabukodonosor a risibí no a hasié un profeta den henter e dimenshon di e ministerio akí.

E Preis di Ta un Berdadero Profeta

Durante e añanan ku nos a sirbi den e Kas Editorial Spañó di Sùit Amérika, nos a risibí mas ku un dozein di manuskrito ku ta kontené aparente mensahenan profétiko pa Iglesia Atventista di e di Shete Dia. Algun a ser mandá pa nos pa evaluá nan contenido Otronan a bin ku e supuesto òrdu divino pa publiká nan inmediateamente. Dor ku nos a nenga e posibilidat ei, un kantidat di hende a kondená nos na maldishon eterno pa no a kumpli ku nan demanda.

Nos a haña sa ku mayoria di e presunto profetanan akí tin algu en komun: un deseo kasi desesperá pa ser rekonosé komo profeta. Sinembargo, ora nos eksaminá e eksperensia di e profetanan bíblico, nos ta mira ku kosnan ta kompletamente otro: hopi di nan a resistí di aseptá e yamada (Jer. 1:6; Isa. 6:5; Eks. 4:10-15), òf a pidi numeroso prueba ku nan mester aseptá e yamada ei (Huesnan 6). E motibu prinsipal ta ku, típikamente, un profeta no ta bonbiní (Jer. 20:2; 1 Reinan 18). Esun di “mas grandi” di tur profeta a finalisá ku su kabes riba un skalchi di plata (Mat. 11:11; 14:1-12). E eksperensianan akí a siña nos pa “tèst e spiritunan” (1 Juan 4:1),

spesialmente ora e supuesto profetanan ta insistí ku nan ta ser rekonosé komo mensaheronan di Dios.

Tur falsifikashon ta impliká e eksistensia di algu genuino. De echo, mas sofisticá e falsifikashon ta, mas evidensia e ta duna di e balor di e vershon outéntiko ku e falsifikashon akí ke remplasá. Ta p'esei Satanas ta purba remplasá profetanan berdadero: e ta konsiente di e balor di mensahenan divino berdadero. Laga nos tèst e spiritunan, pero laga nos no silensιά e bos di e Spiritu.

SUGERENSIANAN PA ORASHON

1. Ora bo ta tende mensahenan ku ta bin for di vários hende ku ta bisa di ta papia pa Dios, roga na djE pa yuda bo tin disernimentu tokante loke nan ta bisa.
2. Hasi orashon pa guiansa i sabiduria di Spiritu Santu promé ku bo sostené kualke ser humano ku ta trese mensahenan bíbliko.
3. Elevá un orashon na Dios ora “bèrdat nobo” bin na bo atenshon, i saminá esaki ku súplika pa Spiritu Santu mustrá bo loke ta Su bèrdat. Permití pa e posibilidat ku E no ta afirmá loke bo ta pensa.